

Kahwin dan Masyarakat Berumah tangga

Soal Nafkah Menurut Ajaran Islam

Suami wajib memberi nafkah (belanja) kepada isteri dan anak-anaknya. Ukuran banyaknya belanja itu adalah menurut kecukupan yang lazim pada sesuatu tempat dan waktu, dan juga bertalian dengan kesanggupan si suami itu sendiri.

Dalam al-Quran tidak disebutkan berapa jumlahnya yang ditetapkan berkenaan dengan nafkah yang diberikan oleh seseorang suami kepada isterinya, hanya garis besarnya ditegaskan di dalam firman Allah Taala (*Sūrah al-Ṭalāq*, āyat 7), bahawa seseorang yang mempunyai kemampuan hendaklah memberi nafkah menurut kemampuannya, dan seseorang yang dalam kesempitan penghidupan hendaklah memberi nafkah menurut keadaan dan kesanggupannya pula.

Pesanan Nabi

Di dalam khutbah junjungan kita Nabi Muḥammad *ṣallā Allāh 'alayhi wa sallam*, ketika baginda menunaikan haji yang penyudah, (lebih kurang 81 hari sebelum baginda wafat), baginda telah berpesan, ujarinya: Takutlah kamu akan Allah berkenaan urusan perempuan, sebab kamu mengambil mereka dengan amanah Allah, dan kamu beroleh halalnya kehormatan mereka dengan kalimah Allah. Wajib atas kamu memberi belanja makan minum dan pakaian mereka dengan cara yang baik.”

Tentang cara dan ukuran yang baik di dalam sabda Nabi ini, baginda memakai perkataan bahasa Arab yang ringkas tetapi luas dan dalam sekali ertinya iaitu perkataan “*bi al-Ma'rūf*” yang jikalau diterjemahkan ke dalam bahasa Melayu, maka ertinya ialah: hal (ukuran) yang sudah diketahui ramai dan diakui tentang patutnya. Nilai “baik” bukannya menurut timbangan sendiri. Sebab pandangan seorang yang kikir tentang kepatutan,

jauh bezanya dengan pandang seorang yang tidak bersifat demikian. Kalau terjadi pertelingkahan dalam soal nafkah ini, maka keputusan hakim tentulah mesti didasarkan atas ukuran kepatutan yang muktabar itu.

Demikian pula jika sekiranya ternyata seorang suami tidak membayar nafkah isterinya, sedang si isteri tidak suka dan tidak reda lagi menahan dan menanggung penderitaan yang seperti itu, menurut hukum agama Islam ia boleh menuntut fasakh akan perkahwinannya. Fasakh (merombak ikatan perkahwinan) itu ialah jalan keluar dan pembebasan bagi perempuan dari penderitaannya, dan bagi pihak lelaki pula fasakh itu bererti pembebasan baginya daripada beban yang memberati badannya zahir dan batin.

Panduan Suami yang Baik

Caranya menjadi suami yang baik dapat dicapai dengan jayanya kalau diturut panduan seperti berikut:

1. Peganglah pimpinan rumahtangga mengikut pertunjuk Allah dan sunnah Rasul-Nya: (Pimpinlah anak isterimu menjadi orang yang beribadah).
2. Tunaikanlah kewajipanmu dengan sebaik-baiknya.
3. Pandanglah isterimu sebagai teman hidup yang akrab.
4. Tunjukkanlah cinta kasihmu kepada isterimu.
5. Bermesyuaratlah dengan isterimu.
6. Sebutkanlah kemahuanmu bukan dengan gaya suara laksana jeneral memerintah, tetapi dengan lemah lembut.
7. Janganlah mencacat masakan isterimu, tetapi nyatakanlah keinginanmu terhadap sesuatu makanan.
8. Manusia memang bersifat salah dan khilaf, tetapi jangan mencela kesalahan isterimu di hadapan orang lain.
9. Bantulah meringankan beban isterimu.
10. Berlakulah jujur sebagai suami, jangan kejam dan bermaharajalela, dan jangan pula bersikap memperhamba.
11. Jangan berlaku serong; jangan berjudi dan jangan meminum arak.
12. Berdiamlah di rumah pada waktu seseorang itu patut berdiam di rumah.
13. Nilailah perkahwinanmu dengan nilai yang tinggi.
14. Selesaikanlah perselisihan kecil sebelum pergi tidur, jangan dibawa ke besok paginya, apalagi kalau tidak bertegur sapa sampai tiga hari lamanya.
15. Jangan takut mengucapkan kepada isterimu dua perkataan yang menjadi kunci perdamaian hidup berumahtangga: "Aku salah", jika betul telah melakukan suatu kekhilafan atau kesalahan.

Panduan Isteri yang Baik

Demikian pula caranya menjadi isteri yang baik dapat dicapai dengan jayanya kalau diturut panduan ini:

1. Jangan melanggar undang-undang Ilahi dan kewajipan yang telah dinyatakan di dalam al-Qur'an dan hadis Nabi.
2. Kasihlah suami.
3. Jagalah kesucian dan kebersihan, terutama kebersihan gigimu.
4. Pelajarilah tabiat suamimu.
5. Ikhtiarlah supaya rohanimu selalu menarik hatinya.
6. Janganlah cerewet dan jangan terlalu cemburu.
7. Seboleh-bolehnya jauhkanlah suamimu dari hutang.
8. Peliharalah hubungan yang baik dengan keluarga suamimu, terutama dengan mertuamu.
9. Kalau ayahmu kaya, janganlah kekayaan itu dibanggakan kepada suamimu atau kepada keluarganya.
10. Jangan berjudi, dan jangan meminum arak.
11. Semua orang mengetahui bahawa cinta itu ialah suatu hal yang besar di dunia ini; sebab itu janganlah cinta itu sengaja dipertunjukkan di hadapan mata orang lain.
12. Bantulah suamimu untuk mencapai kemajuan.
13. Jangan mudah sahaja percaya akan mulut orang.
14. Jangan berlaku kejam kepada anak tirimu.
15. Jangan membuat ilmu guna-guna bagi suamimu.

(Dari buah kalam al-Ustaz Nasruddin Latif)